



Nunalerinermut, Imminut Pilorsornermut, Nukissiuutinut

Avatangiisinullu Naalakkersuisoqarfik

Assinga Aalisarnermut Piniarnermullu Naalakkersuisoqarfimmut

Tunumi qilalukkat qernertat ikileriarsimanerat pillugu oqaaseqaat

Oqaaseqaat una, NAMMCO-p siunnersuineranut paarlaanneqassanngilaq, tunumi qilalukkat qernertat uumasoqatigiit arlallit piniarneqartartut amerlassusaannik nalilersuinerit tunulequtaat kiisalu siunnersuinerit kingunerisa ilaat uumasoqatigiinnut arlalinngut attuumassutillit, naatsumik allaaseraavut. Oqaaseqaat siunnersuinerunngilaq, siunnersuinerulli pimoorunneqarnissaanik erseqqissaataavoq. Siunnersuinerup sukumiisumik paasinissaanut suliallu aallartinnnginnerani piareersaatinut tunngatillugu NAMMCO¹-mi suleqatigiissitap nalunaarusiai pingasut innersuussutigineqarput. NAMMCO-mit ilisimatuussutsikkut siunnersuineq peqassutsimik naliliinertut iluseqarpooq, taakku qarasaasiami kisitsinerit tunngavigalugit suliaapput, uumasoqatigiillu soorlu assersuutigalugu qilalukkat qernertat ineriaartorsinnaanerannik takutitsippu. Tunumi uumasoqatigiit pingasut peqassutsimik nalilersuinermi naatsorsorneqassapput.

Peqassutsimik nalilersuinissami pisariaqartoq tassaavoq uumasut (art) uumasoqatigiinnut immikkuuititaartunut amerliartortunut agguataarneqarsinnaanerat. Qilalukkat qernertat sumiiffinnut aalajangersimasunut atasarput, kangerluillu aasat tamaasa uteqqiaffigisarpaat. Qilalukkat qernertat uumasoqatigiit aasaanerani ornittakkaminni taamaalillutik agguataarlutik inisisimasarput. Tunumi Tasiilap, Kangerlussuup aamma Ittoqqortoormiit kangerluuni aasakkut takussaasarput. Taakku saniatigut Tunup Avannaarsuani uumasoqatigiit ataatsit arlallilluunniit uumapput, taakkuli piniarneqarneq ajorput. Ittoqqortoormiilli eqqaanni aasakkutpisaqartoqarsinnaasarpooq, nunamut eqqissisimatitamut aasaanerani ornittakkaminnukaasut ilaatigut pisarineqarsinnaasarmata. Taamaalineranili pisaasartut ikipput aamma oqaaseqaammi uani taaneqaqqittussaanngillat.

Uumasoqatigiit assigiinngitsut ineriaortnerat naatsorsussagaanni pisarineqarsimasut oqaluttuarisaanermut ilangunneqarsimasut uumasoqatigiinnut assigiinngitsunut agguataarneqassapput. Qilalukkat qernertat ukioq kaajallallugu Tasiilamiittartut aammalu Kangerlussuup Ittoqqortoormiillu aasaanerani eqqaanniittartut Kalaallit Nunaanni sumiiffinni arlalinngut naleqqiullugit allaanerusut timip kingornuttagaanik missisuinerup takutippaa, avannarpasinnerusumiittut aamma allaanerupput.

¹ Tunumi qilalukkat qernertat pillugit NAMMCO-p suleqatigiissitaata nalunaarusiai 2019-iminngaanneersut, 2021-minngaanneersut aamma 2023-minngaanneersut uani nassaarineqarsinnaapput:

https://nammco.no/topics/narwhal_beluga_reports/


Tunumi uumasoqatigiit pingasut piniarneqarsinnaasut ineriarnerat qarasaasiami natsorsuinermi takuneqarsinnaavoq, tassani kisitsinerit, piniartut paassisutissaataat uumasullu oqaluttuassartaani uuttuutaasartut (soorlu qanoq akulikitsigisumik naartusarnerat) tunngavigalugit suliarineqarsimavoq, taamaalilluni qilalukkat qernertat pisarineqartarnerisa sunniutaat pillugit ataatsimoortumik naliliisoqarsinnaaniassammat. Kalaallit Nunaanni Canadamilu uumasoqatigiit piniarneqarsinnaasut akornanni Tunumiittut uumasoqatigiit pingasut ikinnersaraat. Tunumi uumasoqatigiit piniarneqarsinnaasut pingasut ineriarnerat ataani nassuiardeqassaaq.

Ittoqqortoormiit

Eqimattat aasaanerani Ittoqqortoormiit Kangertittivaanut eqqaanilu kangerlunnut takkuttartut pillugit qarasaasiami naatsersukkani qilalukkat qernertat pillugit peqassutsimik naatsorsuinerntu allanut naleqqiullugit paassisutissanik amerlanerusunik tunngaveqarpoq. 1955-iminngaannii ullumimut pisarineqarsimasut oqaluttuarisaanermut ilangunneqarsimasut saniatigut qarasaasiakkut naatsorsuinerit uumasoqatigiit immikkoortut pingasut timmisartumik kisinneqarnerat pillugu peqassutsimik naliliisimanermi tunngavigineqarput, sumiiffik tamaat kisitsivigineqarpoq, aamma kisitsinerit pingasut sumiiffinni ilaannakortuningaanneersut ilangunneqarput. Taakku saniatigut qilalukkat qernertat 119-it ukiuisa agguataarneqarnerat ilangunneqarpoq, arnavissat arfinillit piaqqiortsinnaasut ukiuisa missiliorneqarnerat (aldersmodelhed) kiisalu paassisutissat piffissap ingerlanerani qassink piaqqiortsinnaanerannut tunngasut. Arnavissat piaqqiortsinnaasut 92-it piffissap ingerlanerani qassink piaqqiortsinnaanerannik piniartut naatsorsuisimapput, arnavissallu 42-it pillugit uumassusilerituut aamma naatsorsuisimallutik.

Uumasoqatigiit ineriarnerat aamma arnavissat akornanni piffissap ingerlanerani qanoq piaqqiortsinnaatignerat qarasaasiap paassisutissat aallaavigalugit nassuiardsinnaasarpai (Takussutissiaq 1). Qilalukkat qernertat 1955-imi kangerlunniittut 2.110-it (90 % CI: 1.530-2.830) missaanniissimasut qarasaasiap ilaatigut naatsorsorsimavaa. Tassanngaannii uumasoqatigiit piniagaanerat peqqutaalluni sukkasumik ikiliartulersimapput, pisarineqartartullu 2006-ip tungaanut amerliartuinnavissimallutik, uumasoqatigiinni uumasut 120-t pisarineqarsimapput. Peqassutsimik naliliinerit kingullit 2022-meersut naapertorlugit uumasut 176-iunissaat naatsorsuutigineqarpoq (95 % CI: 53-590), tassa imaappoq uumasut aallaqqaammut amerlassuserisimasaasa 10 %-ii inulersimavaat.

2010-p missaaninngaannii uumasoqatigiit 1.000-it inorlugit amerlassuseqarnerisa nalaanni piaqqiortsinnaanerat tassanngaannarsuaq 33 %-iminngaannii appariartulersimavoq (agguaqatigiissitsigaanni arnaviaq ataaseq ukiut pingajussaanni ataatsimik piaqqisarluni), ullumikkumut piaqqortoqanngivissortalerluni. Appariarnerannut peqqutaasoq sunarpiaanersoq ilisimaneqanngilaq, piniagaaneralli sunniuteqarsimagunarpoq. Sunaluunniit peqqutaagaluarpat uumasoqatigiit amerliartornerat ullumikkut pitsaanngitsumut killissimavoq – tassa imaappoq ikiliartorput – piniarneqarnerat unitsinneqaraluarpuunniit. Uumasoqatigiinniittut ikinnerat ilanggullugu eqqarsaatigigaanni uumasoqatigiit ukiut amerlangitsut qaangiuppata nungussinnaapput, tassa piniarneq ingerlaannassappat. Qilalukkanik qernertanik pisaqartoqartartinnagu assersuutigalugu ukioq 2030-mi uumasut 100-t inorlugit amerlassuseqalersimanissaat 24 %-imik illimanaateqarpoq.




Takussutissiaq 1. Ittoqqortoormiit Kangertittivaani qilalukkat qernertat arnavissat piaqjorsinnaasut amerlassusaat (saamerleq) aamma piaraasartut agguaqatigiissillugu amerlassusaat (talerperleq). Titarnerit qummut ammullu ingerlanerat pisuusaartitaapput, toornerit anginerit kisitsisitigut paasissutissaapput, toorneeqqat qummut ammullu ingerlaartut aamma titarnerit tukimoortut pisuusaartitap kisitsisitigullu paasissutissat nalorninartoqarneranik takussutissiipput.

Kangerlussuaq

Ittoqqortoormiini uumasoqatigiinnut sanilliussissagaanni Kangerlussuarmi uumasoqatigii aasaanerani takkusimaartartut pillugit kisitsisitigut paasissutissat ikinnerupput. Taamaattorli 1955-iminngaanniit ullumimut tulleriaanik piniartoqartarsimaneneranik takussutissaqarpoq kiisalu kisitsinerit 2008-minngaanniit, 2016-iminngaanniit aamma 2022-minngaanniit pingasut pigineqarlutik. Sumiiffinni allaninngaanniit qilalukkat qernertat sananeqaataat pillugit ilisimasavut annertummata ikinnerpaamik kisitsinermik ataatsimik (peqassutsimik naliliineq sukumiisoq) kiisalu tulleriaanik pisaqartarsimanerit pillugit paasissutissanik pisariaqartitsisoqarpoq, taamaallilluta piffissap ingerlanerani ineriartorneq naatsorsorsinnaaniassagatsigu.

Kangerlussuarmi uumasut 1955-imi 1.050-it (90 % CI: 730-1.640) missaanniissimassangatinneqarmata Ittoqqortoormiit Kangertittivaaniittunut sanilliukkaanni affaasa missaannik amerlassuseqarsimassapput (Takussutissiaq 2). Piffissap ingerlanerani ineriartorneq taamaapajaaginnarsimavooq, taamaattorli pisarineqartartut ikinnerungaatsiarsimapput, uumasoqatigiit amerlassusaat aallaqqaammut naleqqiulligit 20 %-it inorlugit amerlassuseqalersimallutik, 2022-mi 188-inut missilorneqarsimapput (95 % CI: 85-417).

Kangerlussuarminngaanniit piaqqiortarnerit pillugit kisitsisitigut paasissutissanik sukumiisunik pigisaqannginnatta naatsorsuineremi qilalukkap qernertap sananeqaataa aallaavigineqarpoq, taannalu naapertorlugu ukiumut amerliartornerat 2,4 %-iussangatinneqarpoq (90 % CI: 0,3-4,7 %). Pisaqartoqartanngikkaluarpalluunniit uumasut uumasoqatigiinni taakkunaniittut ukioq 2030-mi 100-init ikinnerunissaat 15 %-imik ilimanaateqarpoq.




Takussutissiaq 2. Kangerlussuarmi qilalukkat qernertat eqimattaniittut amerlassusaat. Takussutissiaq saamerleq pisuusaartitaminggaanneerpoq, taanna siunnersuinermi atorneqarsimavoq, aamma takussutissiaq talerperleq pisuusaartitamit allaminngaanneersuuvoq, tassani sumiiffiminngaanniit aniasimasut ilanngunneqarsimapput kiisalu pisarineqartartut ikinaarlugit nalunaarutigineqartarnerat ilanngunneqarsimalluni. Titarnerit qummut ammullu ingerlanerat pisuusaartitaapput, toornerit anginerit kisitsinerupput, toorneeqqat qummut ammullu ingerlaartut aamma titarnerit tukimoortut pisuusaartitap kisitsinerillu nalorninartoqarneranik takussutissiipput.

Tasiilaq

Kisitsositigut paasissutissat Tasiilap eqqaaninnganneersut Kangerlussuup eqqaaniittut amerlaqtiginnangajappaat. Tasiilap eqqaanili qilalukkanik qernertanik 2016-im 2022-milu kisitsinerni takusaqartoqanngilaq, taamaattumik qarasaasiakkut naatsorsuinermi (Takussutissiaq 3) 1955-iminngaanniit ullumimut tulleriaanik piniartoqartarsimanera pillugu paasissutissanik kiisalu nul-imik missiliorneqarsimasut marluk nalorninartortallit ilanngullugit paasissutissanik tunngaveqarpoq. Sumiiffimmi tassani qilalukkanik qernertanik ikitsunnguanik takkuitsuukkanik peqarsinnaanera nalorninartoqarneranut peqqutaavoq.

Tasiilap eqqaani uumasoqatigiit Kalaallit Nunaanni qilalukkanit qernertanit uumasoqatigiinnit allanit tamanit ikinnerpaapput; oqaluttuarisaanermi aamma ullumikkut. Tasiilap eqqaani qilalukkat qernertat 1955-im 760-it (90 % CI: 560-1.150) missaanniiissimassangatinneqarmata Ittoqqortoormiit Kangertittivaaniittunut sanilliukkaanni 65 %-it missaannik ikinnerusimassangatinneqarput. Uumasoqatigiit taakku marluk ineriarnerat assigiiginnangajassimavoq, aamma pinarneq piaraasartunit naleqqiullugu annertunerujuannarsimavoq. Tamanna peqqutaalluni uumasoqatigiit amerlassusaat ikileriarsimapput, allaat timmisartut atorlugit kisinneqarsinnaajunnaarsimallutik.


Tasiilaminngaanniit piaqqiortarnerit pillugit kisitsositigut paasissutissanik sukumiisunik aamma peqannginnatta qarasaasiami naatsorsuinermi qilalukkap qernertap sananeqaataa aallaavagineqarpoq, taannalu naapertorlugu ukiumut amerliartornerat 3,1 %-iussangatinneqarpoq (90 % CI: 0,5-5,5 %). Pisaqartoqanngikkaluarpalluunniit uumasut uumasoqatigiinni taakkunaniittut ukioq 2030-mi nungutaasimanissaat 33 %-imik ilimanaateqarpoq.



Takussutissiaq 3. Tasiilaq eqqaani qilalukkatt qernertat amerlassusaat. Titarnerit qummut ammullu ingerlanerat pisuusaartitaapput, aamma toornerit anginerit kisitsinerupput, toorneeqqat qummut ammullu ingerlaartut aamma titarnerit tukimoortut pisuusaartitap kisitsinerillu nalorninartoqarneranik takussutissiiput.

Sumiiffiit tamarmik

Qilalukkatt qernertat avatangiisini allannguutinut malussarissuupput, soorlu immap kissakkiartorneranut. Taamatuttaaq umiarsuit angalanerisa qilalukkatt qernertat neriniartarnerannut angalaartarnerannullu akornusersuisarnerat takussutissaqarpoq. 2017-iminngaanniit pisassiissutigineqartartut siunnersuinermit qaffasinnerusarput, Tunumi qilalukkatt qernertat qilalugaqatigiaat immikkoortut pingasuuusut tamarmik nakkutilliinermi maluginiarneqartumi ikiliartornerannut piniarneq peqqutaasoq qularutissaanngilaq (Takussutissiaq 4).



Takussutissiaq 4. Tunumi aqutsiveqarfinni pingasuni tamani pisarineqarsimasut katillugit amerlassusaat (titarneq aappalaartoq). Qernertumik nalunaarsukkat tassaapput pisassiissutigineqarsimasut, aamma qorsummik nalunaarsukkat tassaapput piujuannartitsinissaq tunngavigalugu ilisimatuussutsikkut siunnersuineq, taamaaliornikkut eqimattat 70 %-imik amerlinissaat ilimatsaanneqarpoq.

Inussiarnersumik inuulluaqqusilluta

Rikke Guldborg Hansen aamma Lars Witting

Pinngortitaleriffik